

摛藻堂四庫全書薈要

史部

欽定四庫全書
舊五代史卷五千四百七十

舊五代史卷七十八

宋門下侍郎參知政事監修國史薛居正等撰

晉書第四

高祖紀四

天福四年春正月癸卯帝御崇元殿受朝賀仗衛如式
丙午召太子太師致仕范延光宴于便殿以延光歸命
之後慮懷疑懼故休假之內錫以欵密帝謂之曰無忿

疾以傷厥神無憂思以勞厥衷朕方示信于四方豈食
言于汝也延光俯伏拜謝其心遂安丁未以西京副留守
龍敏為吏部侍郎戊申盜發唐閔帝陵己酉朔方軍
節度使張希崇卒贈太師以澶州防禦使張從恩為樞
密副使甲寅以侍衛步軍都指揮使寧江軍節度使景
延廣為義成軍節度使以義成軍節度使馮暉為朔方
軍節度使乙卯左諫議大夫曹國珍上言請于内外臣
寮之中選才畧之士聚唐六典前後會要禮閣新儀大

中統類律令格式等精詳纂集俾無漏落別為書一部
目為大晉政統從之其詳議官宜差太子少卿梁文矩
左散騎常侍張允大理卿張澄國子祭酒唐汭大理少
卿高鴻漸國子司業田敏禮部郎中呂咸休司勲員外
郎劉濤刑部員外郎李知損監察御史郭延升等一十
九人充文矩等咸曰改前代禮樂刑憲為大晉政統則
堯典舜典當以晉典革名列狀駁之曰作者之謂聖述
者之謂明苟非聖明焉能述作若運因革故則事乃惟

新或改正朔而變犧牲或易服色而殊徽號是以五帝
殊時不相沿樂三王異世不相襲禮至于近代率由舊
章比及前朝日滋條目多因行事之失改為立制之初
或臣奏條章君行可否皆表其年月紀以姓名聚類分
門成文作則莫不悉稽前典垂範後昆述自聖賢歷于
朝代得金科玉條之號設亂言破律之防守而行之其
來尚矣皇帝陛下運齊七政歷契千年爰從創業開基
莫不積功累德所宜直筆具載鴻猷若備錄前代之編

年目作聖朝之政統此則是名不正也夫名不正則言
不順而媚時掠美非其實矣若翦截其辭此則是文不
備也夫文不備則啓爭端而禮樂刑政于斯亂矣若改
舊條而為新制則未審何門可以刊削何事可以編聯
既當革故從新又須廢彼行此則未知國朝能守不能
守乎臣等同共參詳未見其可疏奏嘉之其事遂寢辛
酉以前晉昌軍節度使李周為靜難軍節度使是日封
皇第十一妹安定郡主為延慶長公主皇第十二妹廣

平郡主為清平長公主二月辛卯改東京玉華殿為永福殿中書上言太原潛龍莊望建為慶長宮使相鄉望改為龍飛鄉都尉里望改為神光里從之丁酉宰臣馮道左散騎常侍韋勲禮部員外郎楊昭儉自契丹使迴帝慰勞備至錫賚豐厚庚子以天和節宴羣官于廣政殿賜物有差三月癸卯朔左僕射劉昫給事中盧重自契丹使迴頒賜器幣如馮道等乙巳迴鶻可汗仁美遣使貢方物中有玉狻猊寶奇貨也丙午涇州節度使張

萬進卒贈太師已未皇子開封尹鄭王重貴歸德軍節
度使兼侍衛親軍馬步軍都指揮使劉知遠忠武軍節
度使杜重威並加同中書門下平章事天平軍節度使
趙在禮封衛國公庚申遣內臣趙處玭以版詔徵華山
隱者前右拾遺鄭雲叟玉笥山道士羅隱之靈州戍將
王彥忠據懷遠城作叛帝遣供奉官齊延祚乘驛而往
彥忠率衆出降延祚矯制殺之詔齊延祚辜我誓言擅
行屠戮彰殺降之罪隳示信之文宜除名決重杖一頓

配流王彥忠贈官收葬辛酉封迴鶻可汗仁美為奉化
可汗癸亥以左龍武統軍皇甫遇為鎮國軍節度使張
彥澤為彰義軍節度使夏四月壬申朔以河中節度副
使薛仁謙為衛尉卿丙子以汝州防禦使宋彥筠為同
州節度使以護聖左右軍都指揮使李懷忠為侍衛親
軍馬軍都指揮使領壽州忠正軍節度使以奉國左右
廂都指揮使郭謹為侍衛親軍步軍都指揮使夔州寧
江軍節度使戊寅詔廢長春宮使額五代會要載原勅云同州長春宮使

額宜停治宮職已外改明德殿為滋德殿宮城南門同
格委州司制置

名故也以華州節度使劉遂凝為右龍武統軍以右龍
武統軍張延蘊為絳州刺史庚辰徵前右拾遺鄭雲叟
為右諫議大夫王筠山道士羅隱之賜號希夷先生甲
申以翰林學士承旨兵部侍郎崔棁權判太常卿以端
明殿學士戶部侍郎和凝為翰林學士承旨樞密院學
士尚書倉部郎中司徒詡樞密院學士尚書工部郎中
顏衎並落職守本官樞密副使張從恩改宣徽使初廢

樞密院故也先是桑維翰免樞密之務以劉處讓代之奏議多不稱旨及處讓丁母憂遂以密院印付中書故密院廢焉丙戌以韓昭肩為兵部尚書致仕馬肩孫為太子賓客致仕房嵩為右驍衛大將軍致仕皆唐末帝之舊臣也戊子升永岳二州為團練使額改湘川縣為全州從馬希範之奏也五月壬寅朔帝御崇元殿受朝伏衛如式癸卯以左僕射劉昫兼太子太保封譙國公乙巳昭順軍節度使姚彥章卒升靈州方渠鎮為威州

隸于靈武改舊威州為清邊軍戊申湖南節度使馬希
範加天策上將軍以前邠州節度使安叔干為滄州節
度使庚戌虞部郎中楊昭儉可本官知制誥辛亥置靜
海軍于溫州從錢元瓘之請也壬子以侍御史盧價為
戶部員外郎知制誥戶部尚書崔檢卒甲寅詔止絕朝
臣不得外州府求覓表狀奏薦交親乙卯升金州為節
鎮以懷德軍為使額以齊州防禦使潘瓌為懷德軍節
度使右諫議大夫致仕鄭雲叟賜號逍遙先生仍給致

仕官俸丁已以刑部尚書姚頴為戶部尚書以兵部侍郎擢判太常卿事崔悅為尚書左丞以工部侍郎任贊為兵部侍郎以禮部尚書李憚為刑部尚書以左丞盧詹為禮部尚書以左散騎常侍韋勲為工部侍郎庚申廢華清宮為靈泉觀辛酉御史臺奏省郎知雜之時赴臺禮上軍巡邸吏之輩咸集公參赤縣府司悉呈杖印今後年深御史判雜上事欲依前例從之丙寅以鎮海軍衛內統軍上直馬步軍都監檢校太傅睦州刺史陸

仁章為同平章事遙領遂州武信軍節度使以鎮海軍
興武左右開道都指揮使明州刺史仰仁銓為檢校太
傅同平章事領宣州寧國軍節度使從錢元瓘之請也
六月辛未朔陳郡民王武穿地得黃金數餅州牧取而
貢之帝曰宿藏之物既非符寶不合入官命付所獲之
家庚辰西京大風雨應天福門屋瓦皆飛鴟吻俱折辛
卯詔禮部貢舉宜權停一年秋七月庚子朔日有食之
西京大水伊洛瀍澗盡溢壞天津橋癸卯以華清宮使

李頃為右領軍衛上將軍甲辰以定州節度使皇甫遇
為潞州節度使檢校太尉以潞州節度使侯益為徐州
節度使戊申御史中丞薛融等上詳定編勅三百六十
八道分為三十一卷是日詔先令天下州郡公私鑄錢
近多鉛錫相兼缺薄小弱有違條制令後私鑄錢下禁
依舊法壬戌以太子少保梁文矩為太子太保致仕閏
七月庚午朔百官不入閣雨霑服故也壬申以中書侍
郎平章事集賢殿大學士桑維翰為檢校司空兼侍中

相州彰德軍節度使以彰德軍節度使王延脣為義武
軍節度使尚書戶部奏李自倫義居七世準勅旌表門
間先有鄧州義門王仲昭六代同居其旌表有廳事步
欄前列屏樹烏頭正門闊一丈二尺其間相去一丈
柱端安瓦桶墨染號為烏頭築雙闕一丈在烏頭之南
三丈七尺夾街十有五步槐柳成列今舉此為例則令
式不該詔王仲昭正廳烏頭門等制不載令文又無勅
命既非故事難贅大倫宜從令式祇表門間于李自倫

所居之前量地之宜高其外門門外安綽櫞門外左右各建一臺高一丈二尺廣狹方正稱臺之形圬以白泥四隅漆赤其行列樹植隨其事力其同籍課役一準令文壬午濮州刺史武從諫勒歸私第受賦十五萬故也丁酉故皇子河南尹重又妻虢國夫人李氏落髮為尼賜名悟因仍錫紫衣法號及夏臘二十八月己亥朔河決博平甘陵大水辛丑以守司空兼門下侍郎平章事弘文館大學士馮道為守司徒兼侍中封魯國公壬寅

詔曰皇圖革故庶政為新宜設規程以諧公共其中書
印紙委上位宰臣一人知當戊申前兵部尚書王權授
太子少傅致仕己酉以天下兵馬副元帥鎮海鎮東等
軍節度使檢校太師行中書令吳越王錢元瓘為天下
兵馬元帥壬子升亳州為防禦使額依舊隸宋州丙辰
司天監馬重績等進所撰新歷降詔褒之詔翰林學士
承旨和凝制序命之曰調元歷九月辛未以右羽林統
軍周密為鄜州節度使癸酉升婺州為武勝軍額丁丑

宴羣臣于永福殿契丹使默納庫來聘致牛馬大腊顛
驥十四 遼史會同二年正月戊申晉遣金吾衛大將軍
馬從斌考功郎中劉知新來貢珍幣丙辰晉遣
使謝免沿邊四川錢幣七月戊申晉遣使進犀帶閏月
乙酉遣使賜晉良馬八月乙丑晉遣使貢歲幣奏輸戊
亥二歲金已卯遼領洮州保順軍節度使鮑君福加檢
帶于燕京己卯遼領洮州保順軍節度使桑維
校太師兼侍中判湖州諸軍事辛巳相州節度使桑維
翰上言管內所獲賊人從來籍沒財產請止之詔今後
凡有賊人準格律定罪不得沒納家資天下諸州準此
癸未封唐許王李從益為鄆國公奉唐之祀服色旌旗

一依舊制仍以西京至德宮為廟牲幣器服悉從官給
五代會要九月勅周受龍圖立夏殷之祀唐膺鳳歷開
鄆介之封乃賜前朝載稽舊典宜封土宇俾奉宗祧宜
以郇國三千戶封唐許王李從益為郇國公云丙戌高麗王王建遣使貢方物

己丑以中書侍郎平章事李崧權判集賢殿事庚寅詔
停寒食七夕重陽及十月暖帳內外羣官貢獻丙申以
威勝軍節度副使羅周岳為給事中中書舍人李詳改
禮部侍郎禮部侍郎呂琦改刑部侍郎刑部侍郎王松
改戶部侍郎戶部侍郎閻至改兵部侍郎中書舍人王

易簡充史館修撰判館事冬十月戊戌朔故昭信軍節度使白奉進贈太尉丙午以太常卿程遜沒于海廢朝一日贈右僕射庚戌閩王王昶威武軍節度使王繼恭遣僚佐林思鄭元弼等朝貢致書于宰執無人臣之禮帝怒詔令不受所貢應諸州綱運並令林思鄭元弼等押歸本道既而兵部員外郎李知損上疏請禁錫使人籍沒綱運可之收林思等下獄丙辰谿州刺史彭士愁以錦蔣之兵與蠻部萬人掠辰澧二境湖南節度使馬

希範遣牙兵拒之而退金州山賊度從讜等寇洵陽遣
兵討平之十一月甲戌以太子賓客李延範為司農卿
乙亥詔立唐高祖太宗及莊宗明宗廟于洛陽
丁丑祠部郎中知制誥吳承範改中書舍人充翰林學
士翰林學士中書舍人竇貞固改御史中丞御史中丞
薛融改尚書左丞尚書右丞王延改吏部侍郎尚書左
丞崔梲改太常卿戊寅史館奏請令宰臣一人撰錄時
政記逐時以備撰述從之五代會要史館奏唐長壽二年右丞姚璹奏帝王謨訓不

可闕文其伏下所言軍國政事令宰臣一人撰錄號時
政記唐明宗朝又委端明殿學士撰錄逐季送付史館
伏乞遵行者宜令已外吏部侍郎龍敏改尚書左丞已
宰臣一員撰述丑以太子賓客楊凝式為禮部尚書致仕詔建錢鑪于
樂川丙申諫議大夫致仕逍遙先生鄭雲叟卒十二月
丁酉朔百官不入閣大雪故也己亥故皇子重英妻張
氏落髮為尼賜名悟慎并夏臘二十庚戌禮官奏來歲
正旦王公上壽皇帝舉酒奏玄同之樂再飲奏文同之
樂三飲奏同前從之歌辭不錄丙辰詔今後城郭村坊

不得創造僧尼院舍丁巳帝謂宰臣曰大雪害民五旬
未止京城祠廟悉令祈禱了無其驗豈非涼德不儲神
休未洽者乎因令出薪炭米粟給軍士貧民等壬戌禮
官奏正旦上壽宮懸歌舞未全且請雜用九部雅樂歌
教坊法曲從之

舊五代史卷七十八

舊五代史卷七十八攷證

晉書高祖紀四以瀘州防禦使張從恩為樞密副使
樞密副使原本作樞密使按下文亦作樞密副使今
從歐陽史及宋史張從恩傳改正

以版詔徵華山隱者前右拾遺鄭雲叟 右拾遺歐陽
史作左拾遺攷是書前後俱作右拾遺今仍其舊
以潞州節度使侯益為徐州節度使 案宋史侯益傳
天福四年晉祖追念虎牢之功遷武寧軍節度同平

章事是書不載同平章事五代會要所載天福中使
相有侯益與宋史同

令後私鑄錢下禁依舊法 案歐陽史七月丙辰復禁
鑄錢是書作七月戊申

李自倫義居七世準勑旌表門閭 七世歐陽史作六
世又旌表門閭歐陽史作正月與是書作閏七月異
先有鄧州義門王仲昭六代同居 案王仲昭歐陽史

作登州人

乙亥詔立唐高祖太宗及莊宗明宗閔帝五廟于洛陽

案立唐廟于西京歐陽史作十二月與是書作十

一月異

訥默庫舊作貌木孤今改

舊五代史卷七十八 考證

欽定四庫全書
舊五代史卷五十四百八十

舊五代史卷七十九

宋門下侍郎參知政事監修國史薛居正等撰

晉書第五

高祖紀五

天福五年春正月丁卯朔帝御崇元殿受朝賀仗衛如式降德音應天福三年終公私債欠一切除放壬申蜀人寇西鄙羣盜張達任康等刦清水德鐵之城以應之

癸酉湖南奏閩人殺王昶夷其族王延羲因民之欲而
定之甲戌遣宣徽使楊彥詢使于契丹辛巳皇子開封
尹鄭王重貴加檢校太尉乙丑迴鶻可汗仁美遣使貢
良馬白玉謝冊命也庚寅以二王後前右贊善大夫襲
鄆國公楊延壽為太子左諭德三恪汝州襄城縣令襲
介國公宇文頡加食邑三千戶辛卯升絳州為防禦州
癸巳以左神武統軍陸思鐸為右羽林統軍以隴州防
禦使何福進為右神武統軍甲午太常少卿裴羽奏請

追謚唐莊宗皇后劉氏為神閔敬皇后明宗皇后曹氏
請追謚為和武憲皇后閔帝魯國夫人孔氏請追謚為
閔哀皇后從之丙申河中節度使安審信奏軍校康從
受李崇孫大裕張崇于干等以所部兵為亂尋平之死
者五百人二月丁酉朔沙州歸義軍節度使曹義金卒
贈太師以其子元德襲其位乙巳御史中丞竇貞固奏
國忌日宰臣跪爐焚香文武百寮列坐竊惟禮例有所
未安今欲請宰臣仍舊跪爐百寮依班序立詔可之仍

令行香之後飯僧百人永為定例庚戌北京留守安彥
威來朝帝慰接甚厚賜上樽酒壬子升中書門下平章
事為正二品丁巳青州節度使東平王王建立來朝已
未以中書門下侍郎為清望正三品諫議大夫御史中
丞為清望正四品三月丁卯朔右散騎常侍張允改禮
部侍郎辛未宋州歸德軍節度使侍衛親軍馬步軍都
指揮使劉知遠加特進改鄆都留守廣晉尹典軍如故
以兗州節度使李從溫為徐州節度使以北京留守安

彥威為宋州節度使壬申詔朝臣覲省父母依天成例
頒賜茶藥癸酉以青州節度使王建立為昭義軍節度
使進封韓王仍割遼沁二州為昭義屬郡以建立本遼
州人用成其衣錦之美也以晉州節度使李德珫為北
京留守以潞州節度使皇甫遇為晉州節度使是日容
州節度使馬存卒甲戌以給事中李光廷為左散騎常
侍亳州團練使李式為給事中乙亥相州節度使桑維
翰加檢校司徒改兗州節度使許州節度使杜重威改

鄆州節度使河中節度使安審信改許州節度使丁丑
長安公主出降駙馬都尉楊承祚戊寅詔中書門下五
品已上官于兩省上事宰臣押角之禮及第舉人與主
司選勝筵宴及中書舍人靸鞋接見舉人兼兵部禮部
引人過堂之日幕次酒食會客悉宜廢之己卯以前樞
密使劉處讓為相州節度使辛巳湖南遣牙將劉勣領
兵大破溪峒羣蠻收溪錦蔣三州丁亥以秦州節度使
康福為河中節度使以徐州節度使侯益為秦州節度

使庚寅御明德樓餞送昭義軍節度使王建立賜玉斧
蜀馬甲午詔吏部三銓聽四時選擬官旋奏不在團甲
之限夏四月丙申朔宴羣臣于永福殿戊戌曹州防禦
使石暉卒帝之從弟也禮官奏天子為五服之內親本
服周者三哭而止從之己亥罷洛陽京兆進苑囿瓜菜
憫勞人也壬寅右僕射致仕裴皞卒贈太子太保丙午
詔曰承旨者承時君之旨非近侍重臣無以稟朕旨宣
予言是以大朝會宰臣承旨草制詔學士承旨若無區

別何表等威除翰林承旨外殿前承旨宜改為殿直密院承旨宜改為承宣御史臺三司閣門客省所有承旨並令別定其名庚戌以滄州節度使馬全節為安州節度使禮部侍郎張允奏請廢明經童子科從之因詔宏詞拔萃明算道舉百篇等科並停之五月癸酉宋州貢瑞麥兩歧甲申以前徐州節度使長從簡為右金吾衛上將軍丙戌安州節度使李金全叛詔新授安州節度使馬全節以洛汴汝鄭單宋陳蔡曹濮十州之兵討之

以前鄜州節度使安審暉為副以內客省使李守貞為

都監仍遣供奉官劉彥瑤奉詔以諭金全命麾下齊謙

以詔送于淮夷雲夢人齊峴斬謙歸其詔于闕辛卯昭

義節度使韓王王建立薨輶朝二日冊贈尚書令壬寅

寅

上疑脫六月二字少府監致仕尹玉羽卒癸卯淮南使李承裕

代李金全金全南走承裕以淮兵二千守其城甲辰馬

全節自應山縣進軍于大化鎮戊申與鄂州賊軍陣于
安陸之南三戰而後克之斬首三千級生擒千餘人供

奉官安友謙登鋒力戰奮不顧身全節賞其忠勇使馳
獻捷書賜死于路是日削奪李金全官爵丁巳淮夷偽
校李承裕率衆掠城中資貨而遁馬全節入城撫其遺
民遣安審暉率兵以逐承裕擒而斬之執其偽都監杜
光鄰及淮南軍五百餘人露布獻于闕下帝曰此輩何
罪皆厚給放還癸亥道士崇真大師張薦明賜號通玄
先生是時帝好道德經營召薦明講說其義帝悅故有
是命尋令薦明以道德二經雕上印板命學士和凝別

撰新序冠于卷首俾頒行天下秋七月甲子朔降安州
為防禦使額以申州隸許州丙寅安州節度使馬全節
加檢校太尉改昭義軍節度使前鄆州節度使安審暉
加檢校太傅為威勝軍節度使丁卯湖南奏遣天策府
步騎將張少敵領兵五萬樓船百艘次于岳陽將進討
淮夷也甲戌宣徽使楊彥詢加檢校太傅充安國軍節
度使乙亥戶部尚書致仕鄭韜光卒贈右僕射戊寅福
州王延義遣商人間路貢表自述戊子宿州奏淮東鎮

移牒云本國奏書于上國皇帝曰久增景慕莫會光塵
但循戰國之規敢預睦鄰之道一昨安州有故脫難相
歸邊校貪功乘便據壘矧機宜之孰在顧茫昧以難申
否臧皆凶乃大易之明義進取不止亦聖人之厚顏適
屬暑雨稍頽江波甚漲指揮未到事實已違今者猥沫
睿容曲形宸旨歸其俘獲示以英仁其如軍法朝章彼
此不可揚名建德曲直相懸雖認好生匪敢聞命其杜
光鄰等五百七人已令却過淮北帝復書曰昨者灾生

安陸畧接漢陽當三伏之炎蒸動兩朝之師旅豈期邊
帥不稟上謀洎復城池備知本末尋已捨諸俘執還彼
鄉間不唯念効命之人無亦敦善鄰之道今承來旨將
正朝章希循宥罪之文用廣崇仁之美其杜光鄴等再
令歸復尋遣使押光鄴等于桐墟渡淮淮中有棹船甲
士拒之南去不果詔光鄴等歸京師授以職秩其戎士
五百人立為顯義都八月丁酉帝觀稼于西郊己亥詳
定院以先奉詔詳定冬正朝會禮節樂章二舞行列等

事上之事具樂志庚子以前金州防禦使田武為金州
懷德軍節度使辛丑升復郢二郡為防禦使額戊午左
龍武統軍相里金卒廢朝一日贈太師已未太子太師
致仕范延光卒于河陽廢朝二日贈太師丁卯宰臣李
崧加集賢殿大學士以翰林學士承旨戶部侍郎和凝
為中書侍郎平章事丙子廢翰林學士院其公事並歸
中書舍人丁丑以翰林學士中書舍人李慎儀為右散
騎常侍以翰林學士左右補闕李濟為吏部員外郎以

右散騎常侍趙元輔為太子賓客以太子賓客韓惲為
兵部尚書以古諫議大夫段希堯為萊州刺史甲申西
京留守楊光遠加守太尉兼中書令充平盧軍節度使
封東平王戊子改東京上元驛為都亭驛冬十月丁酉
制天下兵馬元帥鎮海鎮東浙江東西等道節度使中
書令吳越王錢元瓘加守尚書令充天下兵馬都元帥
戊戌戶部尚書姚頤卒廢朝一日贈右僕射癸卯湖南
上言福建王延義與弟延政互起干戈內相侵伐甲辰

升萊州為防禦使額以汝州防禦使楊承貴領之以新

授萊州刺史段希堯為懷州刺史丁未契丹使實里來

聘致馬百匹及玉鞍狐裘等

遼史會同三年三月戊辰遣使使晉乙未晉遣使來

覲四月壬寅遣人使晉丙午晉遣宣徽使楊端王眺等

來問起居丙辰晉遣使進茶藥癸亥晉遣使賀端午五

月庚辰晉遣使進弓矢甲申遣皇子天德及檢校司徒

郎用和使晉六月庚子晉遣使來見九月丙戌晉遣使

貢名馬庚申晉遣使貢布

十二月丙申遣使使晉

己酉宴羣臣于永福殿賜帛

有差癸丑詔今後竊盜贓滿者處死三足已上者決杖

配流以盜論者準律文處分又詔過格選人等許赴吏

部南曹台保委正身者降一資注官十一月壬戌遼領
遂州武信軍節度使鎮海軍衙內統軍檢校太傅同平
章事陸仁璋卒贈太子太傅甲子滑州節度使景延廣
加檢校太傅改陝州保義軍節度使以鄭州防禦使駙
馬都尉史匡翰為義成軍節度使戊辰曹州防禦使石
斌加檢校太保充河陽三城節度使庚午以翰林學士
戶部侍郎張昭遠為兵部侍郎丙子冬至帝御崇元殿
受朝賀始用二舞帝舉觴奏玄同之樂登歌奏文同之

樂舉食文舞歌舞昭德之舞武舞歌成功之舞典禮久廢
至是復興觀者悅之丁丑吳越國進奉使陳立亮進冬
日觀仗詩一首帝覽之稱善賜服馬器幣矣未移德州
長河縣大水故也甲申制授閩國王延義檢校太師兼
中書令福州威武軍節度使封閩國王以兩浙西南面
安撫使錢元懿為檢校太尉兼中書令遙領軍州清海
軍節度使又以恩州團練使錢驛為檢校太尉同平章
事遙領楚州順化軍節度使丁亥割衛州黎陽縣隸滑

州十二月壬辰朔遙領洮州保順軍節度使檢校太尉
兼侍中判湖州軍州事鮑君福卒贈太傅丙申詔故靜
海軍兼東南面安撫制置使檢校太傅温州刺史錢弘翼
贈太子太傅故吳越兩軍節度副使檢校太尉錢弘
傳贈太子太師

天福六年春正月辛酉朔帝御崇元殿受朝賀仗衛如
式刑部員外郎李象上二舞賦帝覽而嘉之命編諸史
冊甲子同州指揮使成殷謀亂事洩伏誅時節度使宋

彥筠御下無恩既貪且鄙故殷與子彥璋陰構部下為亂會有告者遂滅其黨乙丑青州奏海凍百餘里丙寅遣供奉官張澄等領兵二千發弁鎮忻代四州山谷吐渾令還舊地先是吐渾苦契丹之虐受鎮州安重榮誘召叛而南遷入常山太原二境帝以契丹歡好之國故遣歸之戊辰詔應諸州無屬州錢處今後冬至寒食端午天和節及諸色受賀不得進貢壬申以左司郎中趙上交為諫議大夫戊寅封唐叔虞為興安王臺駘神為

昌寧公差給事中張豫戶部郎中張守素就行冊禮又詔
嶽鎮海瀆等廟宇並令崇飾仍禁樵採丙戌故皇第
二叔檢校司徒萬友贈太師皇第三叔檢校司空萬銓
贈太尉皇兄故檢校左僕射敬儒贈太傅二月辛卯詔
天下郡縣不得以天和節禁屠宰輒滯刑獄壬辰置浮
橋于德勝口甲午詔諸衛上將軍月俸舊三十千令增
至五十千戊戌以三恪汝州襄城縣令襲介國公宇文
頡為太子率更令己亥詔戶部侍郎張昭遠起居郎賈

緯祕書少監趙熙吏部郎中鄭受益左司員外郎李為
光等同修唐史仍以宰臣趙瑩監修壬寅以三白渠制
置使張琢為給事中戊申詔侯伯來朝君臣相見賞宴
貢奉今後宜停起居郎賈緯以所撰唐年補錄六十五
卷上之帝覽之嘉嘆賜以器幣仍付史館五代會要起居賈緯奏曰
伏以唐高祖至代宗已有紀傳德宗亦存實錄武宗至
濟陰廢帝凡六代惟有武宗實錄一卷餘皆缺畧臣今
搜訪遺聞及耆舊傳說編成六十五卷
目為唐朝補遺錄以備將來史館修述癸丑長安公主
薨帝之長女也算年降于駙馬楊承祚帝悼惜之甚輒

視朝二日追贈秦國公主三月甲子河中節度使康福
進封許國公乙丑左驍衛上將軍李承約卒癸酉詔天
福四年終已前百姓所欠夏秋租稅一切除放夏四月
庚寅朔湖南奏溪州刺史彭士愁五溪酋長等乞降己
立銅柱于溪州鑄誓狀于其上以五溪銅柱圖上之丙
申詔顯義指揮使劉康部下兵五百人放還淮海即安
州所俘也己亥虞部郎中知制誥楊昭倫遷中書舍人
戶部侍郎王松改御史中丞禮部郎中馮玉改司門郎

中知制誥辛丑宰臣監修國史趙瑩奏奉詔差張昭遠等五人同修唐史內起居郎賈緯丁憂去官請以刑部侍郎呂琦侍御史尹拙同與編修又詔史館所闕唐朝實錄請下勅購求並從之五代會要監修國史趙瑩奏自李朝喪亂迨五十年四海沸騰兩都淪覆今之書府百無二三臣等近奉綸言俾令撰述褒貶或從于新意纂修須案于舊章既闢簡編先虞漏畧今據史館所聞唐書實錄請下勅命購求況咸通中宰臣韋保衡與蔣仲皇甫煥撰武宗宣宗兩朝實錄皆遇多事或值播遷雖聞撰述未見流傳其韋保衡裴贊合有子孫見居職任或門生故吏曾記纂修聞此討論謗多欣懼請下三京諸道及内外臣寮凡有將此數朝實錄詣闈進納量其文武才能不拘資地除授

一官如卷帙不足據數進納亦請不次獎酬以勸來者
自會昌至天祐垂六十年其初李德裕平上黨有武宗
伐叛之書其後康承訓定徐方有武寧本末之傳如此
事類記述頗多請下中外臣寮及名儒宿學有于此六
十年內傳述得撰記及中書銀臺史館日厯制誥冊書
等不限年月多少並許詣闈進納如年月稍多記錄詳
備請特行簡拔不限次序臣與張昭遠等所撰唐史叙
本紀以綱帝業列傳以述功臣十志以書刑政所陳條
例請下所司從之壬寅以戶部員外郎知制誥盧價為虞部郎
中知制誥以昭義節度副使陳玄為光祿卿致仕乙巳齊
魯民饑詔充鄆青三州發廩賑貸五月庚申朔以前邢
州節度使丁審琪為延州節度使延州節度使劉景巖

為邠州節度使故皇子果冊贈太尉進封陳王庚午涇
州奏雨雹川水大溢壞州郡鎮戍二十四城甲戌北京
遣牙將劉從以吐渾大首領白承福念寵里赫連功德
來朝邢州上言吐渾移族帳于鎮州封部六月丙申以
前衛尉卿趙延乂為司天監丁酉詔今後藩侯郡守凡
有善政委倅貳官條件開奏百姓官吏等不必遠詣京
闕壬寅右領衛上將軍李頃卒贈太師甲辰迦葉彌陀
國僧哩哩以佛牙泛海而至丙午高麗國王王建加開

府儀同三司檢校太師食邑一萬戶戊午鎮州節度使
安重榮執契丹使伊噲遣輕騎掠幽州南境之民處于
博野仍貢表及馳書天下述契丹援天子父事之禮貪
傲無厭困耗中國已繕治甲兵將與決戰帝發諭止之重
榮跋扈愈甚由是與襄州節度使安從進潛相構謀為
不軌

舊五代史卷七十九

舊五代史卷七十九攷證

晉書高祖紀五五月丙戌安州節度使李金全叛詔新
授安州節度使馬全節以洛汴汝鄭單宋陳蔡曹濮
十州之兵討之案五代春秋五月李金全叛附于
吳馬全節帥師討安州吳人救安州全節敗吳師克
安州金全奔吳六月放吳俘還歐陽史作五月李金
全叛六月克安州馬令南唐書作六月安州節度使
李金全來降遣鄂州屯營使李承裕帥師迎之紀月

互異

執其僞都監杜光鄰 僞都監馬令南唐書作監軍通

事舍人

尋遣使押光鄰等于桐墟渡淮 桐墟原本作桐廬据
通鑑注引九域志云宿州蘄縣有桐墟鎮自桐墟而
南至渦口則濟淮矣今改正

太子太師致仕范延光卒于河陽廢朝二日 案歐陽
史作西京留守楊光遠殺太子太師范延光考本傳

延光本為楊光遠推墮溺水死為之輟朝諱之也

丁卯 案歐陽史作九月 丁卯原本疑有脫字

發并鎮忻代四州山谷吐渾令還舊地 案晉遼吐谷

渾在天福六年通鑑與是書同考天福六年即遼會
同四年也遼史作會同三年晉以并鎮忻代之吐谷
渾來歸與是書異


甲戌北京遣牙將劉從以吐渾大首領白承福念寵里
赫連功德來朝 案通鑑四月辛巳北京留守李德

琬遣牙校以吐谷渾酋長白承福入朝是書作五月
甲戌與通鑑異歐陽史從是書

鎮州節度使安重榮執契丹使伊喇 案遼史作二月

晉安重榮執使者伊喇是書作六月先後互異

實里舊作舍利今改 伊喇舊作拽刺今改



總校官編修臣朱鈴
校對官中書臣吳翼成

謄錄監生臣譚湘鏡

欽定四庫全書會要

史部

舊五代史卷八十三

詳校官內閣侍讀臣孫球

欽定四庫全書叢要卷五千四百八十一

舊五代史卷八十

宋門下侍郎參知政事監修國史薛居正等撰

書第六

高祖紀六

天福六年秋七月己未朔帝御崇元殿視朝庚申升陳州為防禦使額辛酉以前鄧州節度使焦方為貝州節度使壬戌涇州秦西涼府畱後李文謙今年二月四日

閉宅門自焚遣元入西涼府譯語官與來人賈三部族
審書進之以三司使劉審交為陳州防禦使癸亥以前
鄆州節度使趙在禮為許州節度使以前鄆都留守廣
晉尹高行周為河南尹西都留守詔改拱辰威和內直
等軍並為興順甲子以宣徽使權西京留守張從恩判
三司已巳以鄆都留守兼侍衛親軍馬步軍都指揮使
廣晉尹劉知遠為太原尹充北京留守河東節度使仍
割遼沁二州却隸河東以北京留守李德珫為廣晉尹

充鄆都留守以昭義節度使馬全節為邢州節度使加
同平章事甲戌詔今後諸道行軍副使不得奏薦骨肉
為殿直供奉官己卯以前陝州節度使李從敏為昭義
軍節度使以陝州節度使景延廣為河陽三城節度使
兼侍衛親軍馬步軍都虞候以河陽節度使石贊為陝
州節度使壬午突厥遣使朝貢以遼領壽州忠正軍節
度使兼侍衛馬軍都指揮使李懷忠為同州節度使以
宣徽北院使李守貞遙領忠正軍節度使侍衛馬軍指

揮使甲申降御札取八月五日暫幸鄴都沿路供頓並委所司以官物排比州縣不得科率人戶丙戌以右諫議大夫趙遠為中書舍人吏部郎中鄭受益為右諫議大夫刑部郎中殷鵬為水部郎中知制誥八月戊子朔以皇子開封尹鄭王重貴為東京留守以天平軍節度使兼侍衛親軍馬步軍副都指揮使杜重威為侍衛親軍馬步軍都指揮使以宣徽南院使張從恩為東京內外兵馬都監改奉德馬軍為護聖放文武百官朝參取

便先赴鄆都壬辰車駕發東京己亥至鄆左右金吾六
軍儀仗排列如儀迎引入內改舊澶州為德清軍以內
客省使劉遂清為宣徽北院使判三司壬寅制應天福
六年八月十五日昧爽已前諸色罪犯常赦所不原者
咸赦除之其持仗行劫及殺人犯並免罪移鄉配逐處
軍都收管犯枉法贓者雖免罪不得再任用諸徒流人
並放還貶降官未量移與量移者約資叙用天福五年
終已前殘稅並放應河東起義之初及收復鄆都汜水

立功將校並與加恩亡歿者與追贈自東京至鄴都緣
路昨因行幸有損踐田苗處據頃畝與放今年租稅鄴
都管內有潛龍時在職者並與加恩者年八十以上者
版授上佐官天下農器並許百姓自鑄造亡命山澤者
招喚歸業百日不出者復罪如初唐梁國公狄仁傑宜
追贈官秩應天福三年已前敗闢場院官無家業者並
與除放其人免罪永不任使私下債負徵利及一倍者
並放主持者不在此限丁未以客省使將作監丁知浚

為內客省使引進使鴻臚卿王景崇為客省使殿中監
判四方館事劉政恩為引進使壬子改鄴都皇城南門
應天門為乾明門大明館為都亭驛甲寅遣光祿卿張
澄國子博士謝攀使高麗行冊禮九月己未以兵部侍
郎閻至為吏部侍郎辛酉滑州河決一溉東流鄉村戶
民攜老幼登邱冢為水所隔餓死者甚衆壬申忠武建
武等軍節度使守太傅兼中書令行蘇州睦州刺史錢
元璿進封彭城郡王遙領廣州清海軍節度使判婺州

軍州事錢元懿為檢校太師乙亥遣前邢州節度使楊彥詢使于契丹錫賚甚厚丁丑吐渾遣使朝貢壬午夜有彗星出于西方長二丈餘在房一度尾跡穿天市垣東行踰月而滅丙戌兗州上言水自西來漂沒秋稼冬十月丁亥朔遣鴻臚少卿魏玭等四人分往滑濮鄆澶視水害苗稼已丑詔以胡梁度月城為大通軍浮橋為大通橋壬寅詔唐梁國公狄仁傑可贈太師十一月丁未鄭王夫人張氏薨福州王延義遣使貢方物甲寅遣

太子賓客韞延祚吏部郎中盧撰持節冊天下兵馬元
帥守尚書令吳越國王錢元瓘甲子以御史中丞王松
為尚書右丞中書舍人史館修撰判館事王易簡為御
史中丞戶部侍郎張昭遠為兵部侍郎國子祭酒田敏
以本官兼戶部侍郎辛未太妃皇后至自東京壬申遣
給事中李式考功郎中張鑄持節冊閩國王王延義甲
戌太子少傅致仕王瓘卒贈左僕射丁丑襄州安從進
舉兵叛以西京留守高行周為南面行營都部署率兵

討之以前同州節度使宋彥筠為副以宣徽南院使張
從恩監護焉十二月丙戌朔以東京留守開封尹鄭王
重貴為廣晉尹進封齊王以鄆都留守廣晉尹李德珫
為開封尹充東京留守南面軍前奏十一月二十七日
武德使焦繼勲先鋒都指揮使郭金海等于唐州南遇
安從進賊軍一萬餘人大破之案宋史陳思讓傳思讓
為先鋒右廂都監從武
德焦繼勲領兵進討遇從進之師于唐州花山下急擊大破之生擒衙內都指揮使安
弘義獲山南東道之印安從進單騎奔逸丁亥詔襄州

行營都部署高行周權知襄州軍州事是日鎮州節度使安重榮稱兵向闕以侍衛親軍馬步軍都指揮使杜重威為北面行營招討使率兵擊之以邢州節度使馬全節為副以前貝州節度使王周為馬步軍都虞候癸巳武德使焦繼勲奏安從進遣弟從貴領兵千人取接均州刺史蔡行遇尋領所部兵掩殺賊軍七百餘人生擒安從貴截其雙腕却放入城戊戌以皇子重睿為銀青光祿大夫檢校尚書左僕射己亥北面軍前奏十三

日未時于宗城縣西南大破鎮州賊軍殺一萬五千人
餘黨走保宗城縣是夜三更破縣城前深州刺史史虔
武自縛歸降獲馬三千匹絹三萬疋餘物稱是安重
榮脫身遁走是日百官稱賀癸卯削奪安從進安重榮
左身官爵右金吾上將軍長從簡卒廢朝贈太師乙巳
天下兵馬都元帥守尚書令吳越國王錢元瓘薨廢朝
三日謚曰文穆是日帝習射于後苑諸軍都指揮使已
上悉預焉賜物有差丁未南面行營都部署高行周奏

今月十三日部領大軍至襄州城下相次降賊軍二千人其降兵馬軍詔以彰聖為號步軍以歸順為號庚戌以權知吳越國事錢弘佐為起復鎮軍大將軍檢校太師兼中書令杭州越州大都督鎮海鎮東等軍節度使封吳越國王壬子杜重威部領大軍至鎮州城下天福七年春正月丙辰朔不受朝賀用兵故也戊午以前將作監李錯為少府監北面招討使杜重威奏今月二日收復鎮州斬安重榮傳首闕下帝御乾明樓宣露

布訖大理卿受讞付市徇之百官稱賀曲赦廣晉府禁
囚遼史云戊辰晉函安重榮首來獻上數欲親討重榮至是乃止辛酉追贈皇弟三人
故沂州馬步軍都指揮使贈太傅德再贈太尉追封福
王故檢校太子賓客贈太傅殷再贈太尉追封通王故
彰聖右第三軍都指揮使長州刺史贈太傅威再贈太
尉追封廣王壬戌追贈皇子五人故右衛將軍贈太保
重英再贈太傅追封虢王故權東京留守河南尹贈太
傅重乂再贈太尉追封壽王故皇城副使贈太保重裔

再贈太傅追封鄭王故河陽節度使贈太尉重信再贈太師追封沂王故左金吾衛將軍贈太保重進再贈太傅追封夔王癸亥改鎮州為恒州成德軍為順國軍丙寅以門下侍郎平章事監修國史趙瑩為侍中青州節度使楊光遠加食邑改賜功臣名號兗州節度使桑維翰加檢校太保河東節度使劉知遠加兼侍中以鄆州節度使北面行營招討使侍衛親軍都指揮使杜重威為恒州順國軍節度使加兼侍中皇子廣晉尹兼功德

使齊王重貴加兼侍中秦州節度使侯益加特進增食
邑丁卯以判四方館事孟承誨為太府卿充職戊辰以
滄州節度使安叔干為邢州節度使以北面行營副招
討使邢州節度使馬全節為定州節度使以定州節度
使王廷肩為滄州節度使以前邢州節度使楊彥詢為
華州節度使恒州立功將校王溫以降等第除郡庚午
契丹遣使來聘是日上元節六街諸寺燃燈御乾明門
觀之夜半還宮壬申延州節度使丁審琦加爵邑鄧州

節度使安審徽加檢校太傅陝州節度使石贊加檢校
太傅乙亥契丹遣使來聘河陽節度使兼侍衛馬步軍
都虞候景延廣加檢校太尉改鄆州節度使典軍如故
以前貝州節度使北面行營馬步軍都虞候王周為河
陽節度使加檢校太保丁丑以刑部侍郎竇貞固為門
下侍郎以禮部郎中邊歸讐為比部郎中知制誥壬午
以河陽節度使王周為涇州節度使以恒州節度副使
王欽祚為殿中監二月丁亥皇妹清平公主進封衛國

長公主契丹遣使來聘己丑宴于武德殿新恒州節度
使杜重威已下諸軍副兵馬使已下悉預焉賜物有差
己亥以曹州防禦使何建為延州留後涇州奏差押牙
陳廷暉賚勅書往西涼府本府都指揮使等請以陳廷
暉為節度使辛丑宰臣李崧丁母憂起復舊任延州蕃
寇作亂同州鄜州各起牙兵討平之丙午詔鄧唐隨郢
諸州多有曠土宜令人戶取便開耕與免五年差稅三
月己未兵部尚書韓惲卒庚申遣前齊州防禦使宋光

鄆翰林茶酒使張言使于契丹壬戌分命朝臣諸寺觀
禱雨丙寅皇后為妹契丹樞密使趙延壽妻燕國長公
主卒于幽州舉哀于外次辛未滑州節度使駙馬都尉
史匡翰卒輒朝贈太保詔唐州湖陽縣蓼山神祠宜賜
號為蓼山顯順之神乙亥以晉昌軍節度使安審琦為
河中節度使以前亳州防禦使王令溫為貝州節度使
丙子賜宰臣李崧白藤肩輿以起復故也丁丑以晉州
節度使皇甫遇為河陽節度使以壽州節度使兼侍衛

馬軍都指揮使李守貞為滑州節度使以夔州節度使兼侍衛步軍都指揮使郭謹為相州節度使皆典軍如故宰臣于寺觀禱雨閏月丙戌以兵部郎中司徒詡為右諫議大夫戊子兗州節度使桑維翰加特進封開國公庚寅以延州畱後何建為延州節度使以引進使兼殿中監劉政恩為太子詹事壬辰宋州節度使安彥威奏修滑州黃河功畢詔于河決之地建碑立廟丙申以鄜州節度使周密為晉州節度使以左羽林統軍符彥

卿為鄜州節度使壬寅詔百官五日一度起居日輪定
兩員具所見以封事奏聞詔改鄜都宣明門為朱鳳門
武德殿為視政殿文思殿為崇德殿畫堂為天清殿寢
殿為乾福殿其門悉從殿名皇城南門為乾明門北門
為玄德門東門為萬春門西門為千秋門羅城南埠門
為廣運門觀音門為金明門橙槽門為清景門冠氏門
為永芳門朝臣門為景風門大城南門為昭明門觀音
門為廣義門北河門為靜安門魏縣門為應福門冠氏

門為迎春門朝城門為興仁門上斗門為延清門下斗
門為通遠門戊申宋州節度使安彥威封邠國公賞修
河之勞也癸丑涇州節度使王周奏前節度使張彥澤
在任日不法事二十六條已改正停廢詔褒之是春鄆
都鳳翔兗陝汝恒陳等州旱鄆曹澧博相洛諸州蝗夏
四月甲寅朔避正殿不視朝日蝕故也是日太陽不虧
百官上表稱賀詔汾河蒲郡節度使刺史並兼管內河
堤使已未右諫議大夫鄭受益兩疏論張彥澤在涇州

之日違法虐民支解掌書記張式部曲楊洪等請下所
司明申其罪皆畱中不出庚申刑部郎中李濤張麟員
外郎麻麟王禧同詣閣門上疏論張彥澤罪犯詞甚懇
切宋史李濤傳涇帥張彥澤殺記室張式奪其妻式家
人詣闈上訴晉祖以彥澤有軍功釋其罪濤伏閣抗
疏請寘于法晉祖召見諭之濤樞笏叩階聲色俱厲晉
祖怒叱之濤執笏如初晉祖曰吾與彥澤有誓約恕其
死濤厲聲曰彥澤私誓陛下不忍食其言范延光嘗賜
鐵券今復安在晉祖不能答即拂衣起辛酉詔
張彥澤剗剔賓從誅剗生聚寃聲穢跡流聞四方章表
繼來指陳甚切尚以曾施微功特示寬恩深懷曲法之

慙貴徇議勞之典其張彥澤宜削一階仍降爵一級其
張式宜贈官張式父鐸弟守貞男希範並與除官仍于
涇州賜錢十萬差人津置張式靈柩并骨肉歸鄉所有
先收納却張式家財物畜並令却還其涇州新歸業戶
量與蠲減稅賦翌日以前涇州節度使張彥澤為左龍
武大將軍宋史楊昭儉傳昭儉與李濤論張彥澤不報
會有詔令朝臣轉對或有對事亦許以不時
條奏昭儉復上疏曰天子君臨四海日有萬幾恐建諍
臣彌縫其闕今則諫臣雖設言路不通藥石之論不達
于聖聰而邪佞之徒取容于左右御史臺紀綱之府彈
糾之司銜冤者固當昭雪為蠹者難免放流陛下臨御

以來寬仁太甚徒置兩司殆如虛器遂令節使慢侮朝
章屠害幕吏始訴冤于丹闕反執送于本藩苟安跋扈
之心莫恤寃抑之苦顧曲宸斷誅彥澤以謝軍吏

戊辰廢雄州為昌化軍營州

為威肅軍其軍使委本道差補故涇州節度掌書記張
式贈尚書虞部郎中以式父鐸為沁州司馬致仕弟守
貞為貝州清河縣主簿男希範為興元府文學甲戌詔
皇子齊王就前河府節度使康福第以教坊樂宴會前
見任節度使戊寅前慶州刺史米廷訓追奪在身官爵
配流麟州坐姦妻兄之女也是月州郡十六蝗五月已

亥中書門下奏時屬炎蒸事宜簡省應五日百官起居
望令押班宰臣一員押百官班其轉對官兩員封付閣
門使引進本官隨百寮退不用別出謝恩其文武內外
官寮乞假寧覲搬家婚葬病損並門見門辭諸道進奉
物等不用殿前排列引進使引至殿前奏云某等進奉
奏訖令進奉使便出其進奉專使朝見日班首一人致
詞都附起居刺史并行軍副使諸道馬步軍都指揮使
已下差人到闕並門見門辭州縣官謝恩日甲頭一人

都致詞不用逐人告官其供奉官殿直等如是當直及

合于殿前排立者即入起居如不當直排立者不用每

日起居委宣徽使點檢常須整齊從之時帝不豫難于

視朝故也

遼史二月甲午遣使使脣索吐谷渾叛者契丹國志云遼以脣招納吐谷渾遣使責讓晉

高祖憂成疾左威衛上將軍衛審嶮卒贈太子少保乙巳尊

皇太妃劉氏為皇太后

徐無黨五代史記注云高祖所生母也

丁未工部

侍郎韋勲改刑部侍郎壬子以左散騎常侍李光廷為

秘書監給事中蕭愿為右散騎常侍左諫議大夫曹國

珍為給事中太常卿裴坦為左諫議大夫是日州郡五
奏大水十八奏旱蝗六月丁巳以兗州節度使桑維翰
為晉昌軍節度使以前許州節度使安審琦為兗州節
度使襄州都部署高行周奏安從進觀察判官李光圖
出城請援送赴闕乙丑帝崩于保昌殿壽五十一遺制
齊王重貴于柩前即皇帝位喪紀並依舊制山陵務從
節儉馬步諸軍優紀並從嗣君處分通鑑考異云漢高祖實錄晉高祖大
漸召近臣屬之曰此天下明宗之天下寡人竊而處之久矣寡人既謝當歸許王寡人之願也此說難信

月太常卿崔棁上謚曰聖文章武明德孝皇帝廟號高

祖以其年十一月十日庚寅葬于顯陵宰臣和凝撰謚

冊哀冊文

五代史補高祖尚明宗女宮中謂之石郎及將起兵于太原京師夜間狼皆羣走往往入

宮中愍帝悲之命諸班能射者分頭捕逐謂之射狼或遇諸塗問曰汝何從而來對曰看射狼未幾高祖至蓋

射亦石也

五代史闢文梁開平初潞州行營使李思

安奏函關牒

穰鄉民伐樹樹仆自分為二中有六字如左書云天十四載石進梁帝藏于武庫時莫詳其義至

帝即位識者曰天字取四字兩畫加之于傍即丙字也

四字去中之兩畫加十字即申字也帝即位之年迺丙

申也進者晉也石者姓也臣謹按天祐二十年歲在癸

未其年莊宗建號改同光元年至清泰三年歲丙申其年晉祖即位改元天福元年自未至申凡十四載矣故

識書云天十四載石進者言自天祐滅後十四載石氏興于晉也豈不明乎而拆字解識以就丙申非也

史臣曰晉祖潛躍之前沈毅而已及其為君也旰食宵衣禮賢從諫慕黃老之教樂清淨之風以純為衣以麻為履故能保其社稷高朗令終然而圖事之初召戎為援猶狃自茲而孔熾默叅由是以罹殃迨至嗣君兵連禍結卒使都城失守舉族為俘亦猶決鯨海以救焚何逃沒溺飲鴉漿而止渴終取喪亡謀之不臧何至于是儻使非由外援之力自副皇天之命以茲睿德惠彼蒸

民雖未足以方駕前王亦可謂仁慈恭儉之主也

舊五代史卷八十

舊五代史卷八十攷證

晉書高祖紀六乙亥遣前邢州節度使楊彥詢使于契丹案楊彥詢使于契丹歐陽史通鑑俱從是書作九月遼史作二月己未晉遣楊彥詢來貢且言鎮州安重榮跋扈狀遂留不遣與是書異

丁丑襄州安從進舉兵叛案安從進反歐陽史五代春秋俱作十月通鑑從是書作十一月遼史作十二月戊子晉遣使來告山南節度安重進反則因其赴

告之月而書之也

生擒衙內都指揮使安弘義 案宋史焦繼勲傳作擒
其牙將安洪義鮑洪等五十餘人

是日鎮州節度使安重榮稱兵向闕 案安重榮反歐

陽史通鑑俱從是書作十二月五代春秋繫于十月
之後遼史作十一月丙寅晉以討安重榮來告與是

書異

遣前齊州防禦使宋光鄰 宋光鄰遼史避諱作宋暉

業

宋州節度使安彥威奏修滑州黃河功畢
案修河事
是書紀于閏月壬辰歐陽史作三月歸德軍節度使
安彥威塞決河于滑州蓋以奉使之月言是書以奏
功之曰言也

詔改鄆都宣明門為朱鳳門
朱鳳門五代會要作來
鳳門

皇城南門為乾明門北門為玄德門東門為萬春門西

門為春秋門 案五代會要晉改皇城四門為乾明
玄德萬春春秋在天福六年是書統繫于七年與會
要異

舊五代史卷八十攷證

欽定四庫全書 舊要卷五千四百八十二

舊五代史卷八十一

宋門下侍郎參知政事監修國史薛居正等撰

晉書第七

少帝紀一

少帝名重貴高祖之從子也父諱敬儒母安氏以唐天祐十一年六月二十七日生帝于太原汾陽里敬儒嘗為後唐莊宗騎將早薨高祖以帝為子帝少而謹厚高

祖愛之洎厯方鎮嘗遣從行委以庶事但性好馳射有
祖彌之風高祖鎮太原命琅琊王震以禮記教帝不能
領其太義謂震曰非我家事業也及高祖受圍于太原
親冒矢石數獻可於左右高祖愈重焉高祖受契丹冊
將入洛欲留一子撫晉陽先謀于戎王戎王曰使諸子
盡出吾當擇之乃于行中指帝謂高祖曰此眼大者可
矣遂以帝為北京留守授金紫光祿大夫檢校司徒行
太原尹知河東管內節度觀察事天福二年九月徵赴

閼授光祿大夫檢校太保右金吾衛上將軍三年十二

月授開封尹加檢校太傅封鄭王增食邑三千戶俄加

檢校太尉同書門下平章事六年高祖幸鄴改廣晉

尹進封齊王

以下疑脫七年正月加兼侍中八字

是歲六月十三日乙丑

高祖崩承遺制命柩前卽皇帝位帝在并州未著人望及保釐後郊大有寬裕之稱從幸鄴都是歲遇旱高祖遣祈雨于白龍潭有白龍見于潭心是夜澍雨尺餘人皆異之至是果登大位焉丁卯賜侍衛諸軍將校錢一

百貫下至五貫以初即位示賚也戊辰宰臣馮道等率
百寮請聽政凡三上表允之庚午始聽政于崇德殿門
偏廊分命廷臣以嗣位奏告天地宗廟社稷遣右驍衛
將軍石德超等押先皇御馬二匹往相州西山擆祭用
北族禮也丙子以司徒兼侍中馮道為大行皇帝山陵
使門下侍郎竇貞固副之太常卿崔悅為禮儀使戶部
侍郎呂琦為鹵簿使御史中丞王易簡為儀仗使

徐無黨五

代史記注云舊史實錄無橋道頃
遞使疑不置或闕書漢高祖亦然

己卯遣判四方館事

朱崇節右金吾大將軍梁言持國信物使于契丹是時
河南河北關西並奏蝗害稼秋七月癸未朔百官素服
臨于天清殿戊子詔應官殿州縣及官名府號人姓名
與先帝諱同音者改之改西京明堂殿為宣德殿中書
政事堂為政事廳堂後官房頭為錄事餘為主事

案東都事

畧陶毅傳毅本姓唐避晉祖諱改姓陶益當時避諱之體如此已丑大行皇帝大祥帝

釋縗服百官衣繻辛卯帝除禫服百官吉服壬辰太皇
太后劉氏崩高祖之庶母也遺詔服紀園陵母用后禮

皇帝不得廢軍國機務既而禮官奏準令式為祖父母
齊縗周又準喪奠令皇帝本服周者三哭而止請準後
唐同光三年皇太妃北京薨莊宗于洛京西內發哀素
服不視事三日從之仍遣國子祭酒兼戶部侍郎田敏
奏告高祖靈座癸巳右諫議大夫鄭受益中書舍人楊
昭儉並停現任以請假在外不赴國哀故也丁酉宰臣
馮道等率文武百寮詣崇德殿門拜表請御正殿凡三
上表允之安州奏水平地深七尺庚子帝御正殿宣制

大赦天下諸道州府諸色罪犯除十惡五逆殺人強盜
官典犯贓合作毒藥屠牛鑄錢外其餘罪犯咸赦除之
襄州安從進如能果決輸誠並從釋放其中外臣寮將
校並與加恩天下有蟲蝗處並與除放租稅辛丑恒州
順國軍節度使杜威河東節度使劉知遠並加檢校太
師仍增爵邑青州平盧軍節度使楊光遠加守太師癸
卯鄆州天平軍節度使兼侍衛馬步都虞候景延廣加
特進同中書門下平章事充侍衛親軍都指揮使滑州

義成軍節度使兼侍衛馬軍都指揮使李守貞相州彰
德軍節度使侍衛步軍都指揮使郭謹並加檢校太傅
仍增爵邑宰臣馮道等上表請依舊置樞密使畧曰竊
以樞密使創自前朝置諸近侍其來已久所便尤多頃
歲樞密使創處讓偶屬家艱爰拘喪制既從罷免暫議
改更不曾顯降勅文永停使額所願各歸職分豈敢苟
避繁難伏請依舊置樞密使初高祖事後唐明宗觀樞
密使安重誨秉政擅權賞罰由己常惡之及登極故斷

意廢罷一委中書至是馮道等厭其事繁故復請置之
庶分其權表凡三上不允乙巳徐州節度使李從溫宋
州節度使安彥威並加兼中書令西都留守充襄州行
營都部署高行周加兼侍中鳳翔節度使李從曠加守
太保遣中使就中書賜宰臣馮道生辰器幣道以幼屬
亂離早喪父母不記生日堅讓不受丙午以給事中羅
周岳為左散騎常侍以右諫議大夫符蒙為給事中以
祕書少監兼廣晉少尹邊蔚為右散騎常侍以廣晉少

尹張煦為右諫議大夫以廣晉府判官光祿少卿遷光
範為右諫議大夫丁未荆南節度使南平王高從誨加
兼尚書令湖南節度使楚王馬希範加守太傅自是藩
侯郡守皆第加官封示溥恩也是月州郡十七蝗八月
壬子朔百官素服臨于天清殿乙卯以左散騎常侍羅
周岳為東京副留守庚申以山陵禮儀使太常卿崔棁
為太子賓客分司西都病故也壬戌晉昌軍節度使桑
維翰加檢校太傅甲子宰臣馮道加守大尉趙鎧加中

書令李崧加左僕射兼門下侍郎和凝加右僕射契丹遣使致慰禮馬二十匹及羅絹等物是日襄州行營都部署高行周奏收復襄州安從進自焚而死生擒男弘贊斬之前河東節度使康福卒贈太師謚曰武安戊辰以太子太保兼尚書左僕射劉昫為太子太傅詔賜襄州城內百姓粟大戶二斛小戶一斛以久困重圍也己巳以太子賓客趙元輔權判太常卿事充山陵禮儀使庚午葬太皇太后于魏縣秦固村癸酉契丹遣使致祭

于高祖賄禮御馬二匹羊千口絹千匹契丹主母亦遣使來慰詔免襄州城內人戶今年夏秋來屋稅其城外下營處與放二年租稅應被安從進脅從者俱釋不問是月河中河東河西徐晉商汝等州蝗九月丁丑朔百官素服臨于天清殿已卯分命朝臣詣寺觀禱雨辛巳兩浙節度使吳越國王錢弘佐福建節度使王延義並加食邑仍改賜功臣名號癸未帝御乾明門觀襄州行營都部署高行周都監張從恩等獻俘馘有司宣露布

訖以安從進男弘受等四十四人徇于市皆斬之曲赦
京城禁囚甲申宴班師將校于崇德殿賜物有差乙酉
宰臣和凝上迴河頌賜鞍馬羃帛丁亥以宋州歸德軍
節度使安彥威為西京留守兼河南尹以襄州行營都
部署西京留守高行周為宋州節度使加檢校太師戊
子降襄州為防禦使額均房二州割屬鄧州升泌州為
團練使額己丑以東京留守兼開封尹李德珫為廣晉
尹以宣徽南院使襄州行營都監張從恩為東京留守

兼開封尹加校校太尉以前同州節度使襄州行營副
部署宋彥筠為鄧州威勝軍節度使加檢校太尉山陵
禮儀使撰高祖祔饗太廟酌獻樂章上之庚寅詔今後
除授留守宜降麻制癸巳樂平公主史氏進封魯國大
長公主壽安長公主烏氏進封衛國大長公主鄭國長
公主杜氏進封宋國大長公主荆南高從誨累表讓尚
書令之命已亥追封故秦國長公主為梁國長公主故
永壽長公主為岐國大長公主故延慶長公主為邠國

大長公主辛丑以義成軍節度使兼侍衛馬軍都指揮
使李守貞充大行皇帝山陵一行都部署壬寅以宣徽
北院使判三司劉遂清為鄭州防禦使以澶州防禦使
李承福為宣徽北院使癸卯詔大行皇帝十一月十日
山陵宜自十月一日至十一月二十日不坐放文武百
官朝參甲辰上大行皇帝尊謚寶冊百官素服班于天

清殿

五代會要天福七年中書門下奏山陵禮儀使狀
高祖尊謚號及廟號伏準故事將啟殯宮前擇日

命太尉率百僚奉謚冊告天于圜丘畢奉謚冊跪讀于
靈前此累朝之制蓋以天命尊極不可稽留今所上高

祖聖文章武明德孝皇帝尊謚寶冊伏緣去洛京地遠
寶冊難以往來當司詳酌伏請祇差官往洛京奏告南
郊太廟其日中書門下文武百官立班中
書令侍中升靈座前讀寶冊行告謚之禮禮儀使撰進
高祖祔饗太廟酌獻樂章舞名請以咸和之舞為名從
之冬十月辛亥朔百官素服臨于天清殿襄州利市廟
封為順正王仍令本州脩崇廟宇癸亥啟殯官百官衣
初喪服入臨甲子靈駕進發帝于朱鳳門外行遣奠之
祭辭畢還宮丁丑太保盧質卒贈太子太師謚曰文忠
己卯宰臣李崧母喪歸葬深州遣使弔祭之庚辰契丹

遣使致祭于高祖廟馬三匹衣三襲十一月庚寅葬高
祖皇帝于顯陵壬辰湖南奏前洪州節度使馬希振卒
戊戌詔宰臣等分詣寺廟祈雪庚子祔高祖神主于太
廟辛丑以金吾衛大將軍權判三司董遇為三司使詔
州郡稅鹽過稅斤七錢住稅斤十錢州府鹽院並省司
差人勾當先是諸州府除蠶鹽外每年海鹽界分約收
鹽價錢一千七萬貫高祖以所在禁法抵犯者衆遂開
鹽禁許通商令州郡配徵人戶食鹽錢上戶千文下戶

二百文分為五等時亦便之至是掌賦者欲增財利難于驟變前法乃重其關市之征蓋欲絕其興販歸利于官也其後鹽禁如故鹽錢亦徵至今為弊焉是日詔天地

宗廟社稷及諸祠祭等訪聞所司承管多不精潔宜令

三司預支一年禮料物色于太廟置庫收貯差宗正丞

主掌委監察御史監當祭器祭服等未備者修製五代會要

勅差宗正丞石載仁專主掌監察御史宋彥昇監庫兼
差供奉官陳審琦往洛京于太廟內穩便處修蓋庫屋
五間俟畢日催促所支物色監送入庫交付訖取收領
文狀歸閣每有祠祭諸司各請禮料至時委監庫御史

宋彥昇宗正丞石載仁旋行給付其大祠中祠兼令監察御史檢點小祠即令行事官檢點如致慢易本司准格科條其祭器未有者脩製已有者更仰整飭十二月辛丑以威武軍節度副使充福建管內諸軍都指揮使王亞澄為威武軍副大使知節度事詔諸道州府每遇大祭祀冬至寒食立春立夏雨雪未晴不得行極刑如有已斷下文案可取次日及雨雪定後施行乙丑以前鄆州節度使安審暉為左羽林統軍以前延州節度使丁審琪為右羽林統軍以前金州節度使潘瓌為左神武統軍以前華州節度

京副留守羅周岳為右散騎常侍癸未青州節度使東平王楊光遠進封壽王北京留守劉知遠恒州節度使杜威並加兼中書令乙酉以鄆州節度使符彥卿為河陽節度使以權鄴都留守前開封尹張從恩為鄴都留守廣晉尹以右羽林統軍丁審琪為鄆州節度使丁亥天策上將軍湖南節度使楚王馬希範加守尚書令兼中書令己丑桂州節度使馬希果依前檢校太尉兼侍中兼知朗州軍州事朗州武平軍節度使馬希萼加檢

節度使彭城郡王錢元璽追封廣陵郡王丙子于閨廻
鶻皆遣使貢方物

天福八年春正月辛巳盜發唐坤陵莊宗母曹太后之
陵也河南府上言逃戶凡五千三百八十七餓死者兼
之詔諸道以廩粟賑饑民民有積粟者均分借便以濟
貧民時州郡蝗旱百姓流亡餓死者千萬計東都人士
僧道請車駕復幸東京後唐莊宗德妃伊氏自契丹遣
使貢馬庚寅沙州留後曹元深加檢校太傅充沙州歸

使皇甫立為左金吾衛上將軍以右龍武統軍劉遂凝
為左驍衛上將軍以前貝州節度使馬萬為右驍衛上
將軍以左龍武大將軍張彥澤為右武衛上將軍丙寅
宰臣馮道滑州節度使兼侍衛馬軍都指揮使李守貞
河陽節度使皇甫遇西京留守安彥威廣晉尹李德珫
並加爵邑以山陵充奉之勞也己巳迴鶻進奉使密里
等各授懷化歸德大將軍將軍郎將放還蕃庚午故洪
州節度使馬希振追封齊國公辛未故中吳建武等軍

權鄴都留守以皇弟檢校司徒重睿為檢校太保開封尹年幼未出閣差左散騎常侍邊蔚知府事丁丑以前太僕卿薛仁謙為衛尉卿河中逃戶凡七千七百五十九是時天下饑穀價翔踴人多餓殍右金吾衛上將軍劉處讓卒贈太尉三月己卯朔以中書令監修國史趙瑩為晉昌軍節度使以晉昌軍節度使桑維翰為侍中監修國史通鑑作晉昌節度使兼侍中桑維翰為侍中胡三省注云桑維翰始居藩鎮而兼侍中今八朝正為門下省長官辛巳以左散騎常侍盧重為秘書監以東

義軍節度司癸巳發禁軍萬人并家口赴東京乙己于
闖迴鶻入朝使劉再成等並授懷化大將軍將軍郎將
放還蕃二月庚戌御札取今月十一日車駕還東京沿
路州府不用修飾行宮食宿頓遞並以官物供給文武
臣寮除有公事合隨駕外並先次進發以侍衛親軍使
景延廣充御營使癸丑以廣晉尹李德珫權鄴都留守
己未車駕發鄴都曲赦都下禁囚甲子次封丘文武百
官見于行宮乙丑至東京甲戌以東京留守張從恩為

校太尉進封爵邑以武平軍節度副使岳州團練使馬希瞻為檢校太尉領廬州昭信軍節度使以武安軍節度副使永州團練使馬希廣為檢校太尉領洪州鎮南州節度使皆楚王馬希範之弟也庚寅以宣徽北院使李承福為右武衛大將軍充宣徽南院使以前鄭州防禦使劉繼勲為左千牛衛大將軍充宣徽北院使國子祭酒兼戶部侍郎田敏以印本五經書上進賜帛五十段甲午有白烏棲作坊桐樹作坊使周務掠捕而進之

辛丑引進使太府卿孟承誨使契丹詔京百司攝官親
公事及五年與授初官癸卯以左諫議大夫司徒詡為
給事中左司郎中王仁裕為右諫議大夫前鴻臚卿王
均為少府監夏四月戊申朔日有蝕之庚戌以許州節
度使趙在禮為徐州節度使以徐州節度使李從溫為
許州節度使己巳中書門下奏請以六月二十七日降
誕日為啟聖節從之是月河南河北關西諸州旱蝗分
命使臣捕之五月己卯追封皇故長姊為吳國長公主

癸未皇姪女永福縣主薨輒朝三日追封平昌郡主丁
亥皇第二叔祖贈太師萬友追封秦王皇第三叔祖贈
太尉萬鎰贈太師追封趙王皇伯贈太傅敬儒贈太師
追封宋王皇叔贈太尉福王德贈太師追封如故皇叔
贈太傅暉贈太師追封韓王皇叔贈太尉通王殷皇叔
贈太尉廣王威皇兄贈太傅鄉王重裔並贈太師追封
如故皇兄贈太師沂王重信追封楚王皇兄贈太傅號
王重乂皇兄贈太師夔王重進皇弟贈太尉陳王重果

等並贈太師追封如故仍令所司擇日冊命辛卯以御
史中丞王易簡為尚書左丞以禮部侍郎張允為御史
中丞以中書舍人吳永範為禮部侍郎以吏部侍郎王
延為尚書左丞以尚書右丞王松為吏部侍郎以兵部
侍郎張昭遠為吏部侍郎以戶部侍郎呂琦為兵部侍
郎以刑部侍郎韋勲為戶部侍郎以工部侍郎李詳為
刑部侍郎癸巳命宰臣等分詣寺觀禱雨己亥飛蝗自
北翳天而南太子賓客李棁卒甲辰詔諸道州府見禁

罪人除十惡五逆行刦殺人僞行印信合造毒藥官典
犯贓各減一等外餘並放是時所在旱蝗故有是詔乙
巳幸相國寺祈雨六月庚戌以螟蝗為害詔侍衛馬步
軍都指揮使李守貞往臯門祭告仍遣諸司使梁進超
等七人分往開封府界捕之乙卯以左羽林統軍安審
暉為潞州節度使宿州秦飛蝗抱草乾死丙辰貝州秦
逃戶凡三千七百遣供奉官衛延韜詣嵩山授龍祈雨
戊午以西京留守馬從斌為左監門衛上將軍開封府

界飛蝗自死庚申開封府奏飛蝗大下徧滿山野草苗木葉食之皆盡人多餓死禮部侍郎吳承範卒丙寅以將冊皇太后遣尚書左丞王易簡奏告天地陝州奏蝗飛入界傷食五稼及竹木之葉逃戶凡八千一百丁卯以給事中符蒙為禮部侍郎以左諫議大夫裴坦為給事中辛未遣內外臣寮二十八人分往諸道州府率借粟麥時使臣希旨立法甚峻吏間碓磑泥封之隱其數者皆斃之由是人不聊生物情胥怨是月諸州郡大蝗

所至草木皆盡

舊五代史卷八十一

舊五代史卷八十一攷證

晉少帝紀一命鄒琊王震。案歐陽史作博士王震遣
判四方館事朱崇節。案歐陽史作四方館使宋崇節
恒州順國軍節度使杜威。案杜重威避少帝諱去重
字至漢始復故少帝紀皆作杜威

乙丑至東京。案遼史作丁未晉王至汴與是書異五
代春秋歐陽史通鑑並從是書

河南河北關西諸州旱蝗分命使臣捕之。案歐陽史

作供奉官張福率威順軍捕蝗于陳州

仍遣諸司使梁進超等七人分往開封府界捕之。○案

歐陽史作癸亥供奉官七人帥奉國軍捕蝗于京畿

與是書異

辛未遣內外臣寮二十八人分往諸道州府率借粟麥
○案通鑑七月己丑詔以年飢國用不足遣使者六
十餘人于諸道括民穀與是書異

舊五代史卷八十一 考證